

BASES FESTIVAL CINEOI 2019

O Equipo de dinamización da lingua galega da Escola Oficial de Idiomas da Coruña convoca o **Festival CinEOI Coruña 2019** que, co obxectivo de promover a creatividade audiovisual en galego, se rexe polas seguintes BASES:

O tema das curtametraxes é libre e a súa duración non superará os 10 minutos. As obras deben ser orixinais, creadas e producidas en lingua galega e poden incluír subtítulos nalgunha das linguas estudadas nas EOI. Non se admitirán pezas dobradas ao galego.

A obra presentarse en formato dixital e poderá realizarse con calquera medio de gravación (videocámara, cámara dixital, cámara de móbil, tableta, etc.).

Acéptanse traballos realizados en 2018, sempre que non participasen xa no CinEOI Coruña.

CATEGORÍAS

Haberá catro categorías:

CATEGORÍA XERAL, na que pode participar o alumnado matriculado no curso 2018/2019 en calquera dos seguintes centros:

A EOI da Coruña e as súas seccións.

A EOI de Ferrol e as súas seccións.

O CIFP Escola de Imaxe e Son.

A Escola de Arte e Superior de Deseño Pablo Picasso.

Centros de ensino de adultos e formación de profesorado de A Coruña.

CATEGORÍA XUVENIL, na que pode participar o alumnado matriculado no curso 2018/2019 en ESO, Bacharelato e FP dos centros sostidos con fondos públicos do Concello da Coruña (agás o CIFP Escola de Imaxe e Son) e do IES Manuel Murguía de Arteixo.

CATEGORÍA INFANTIL, na que pode participar alumnado matriculado no curso 2018/2019 en 5º e 6º cursos de E. Primaria dos centros sostidos con fondos públicos do Concello da Coruña. En función do nº de curtametraxes presentadas nesta categoría, proxectaranse todas ou unha escolma delas na xornada de proxección do Festival.

Chega con que un dos autores ou compoñentes do equipo estea matriculado nun dos devanditos centros educativos. Un mesmo autor poderá presentar ata a un máximo de dúas curtas.

CATEGORÍA CinEOI INSPIRACIÓN, na que só pode participar o alumnado matriculado no curso 2018/2019 en calquera dos seguintes centros:

A EOI da Coruña e as súas seccións.

A EOI de Ferrol e as súas seccións.

PREMIOS

CATEGORÍA XERAL

Mellor curta: Curso de Interpretación ou de Guión para dúas persoas impartido por Voz Audiovisual e valorados en 750€ (para realizar os martes -no caso de Guión- e os mércores -no caso de Interpretación- de outubro a decembro de 2019), co financiamento do Concello da Coruña (abono das mensualidades 450€) e de Voz Difusión Noticias SLU (matrícula 300€). A elección dos cursos estará supeditada a que Voz Audiovisual efectivamente os realice, en función de que teña suficientes persoas matriculadas nos ditos cursos.

Premio “Ben Falado” 350€

Mellor fotografía 100€ en material fotográfico outorgado polo EASD Pablo Picasso.

Premio do público agasallos

CATEGORÍA XUVENIL

Premio “Ben Falado”: lote de libros en galego valorados en 250€, outorgado polo Concello da Coruña.

Primeiro premio 250€ outorgado por GADIS

Segundo premio 150€ outorgado por GADIS

Terceiro premio 100€ outorgado por GADIS

CATEGORÍA INFANTIL

Premio “Ben Falado”: lote de libros en galego valorados en 250€, outorgado polo Concello da Coruña.

CATEGORÍA CinEOI Inspiración

Mellor curta de aula 150€ outorgado polas EEOOI participantes.

Premio á mellor vídeo-mensaxe: 100€ outorgado polo FNAC

A data límite de recepción de pezas será o **19 de abril de 2019**.

As curtas presentaranse a través de calquera dos seguintes medios: na conserxaría da EOI da Coruña, en persoa ou por correo postal; por vía telemática, a través de calquera plataforma de transferencia online de ficheiros, enviando a ligazón de descarga ao correo endl.corunha@gmail.com. En calquera dos casos deben figurar os seguintes datos: CinEOI Coruña (ENDL), nome da obra, duración, nome do autor/es, enderezo electrónico, centro no que estuda e, no caso do alumnado das escolas de idiomas, tamén curso, grupo e idioma.

A peza deberá ser orixinal. Quedarán desclasificadas as obras nas que se detecte de forma inequívoca plaxio ou copia. Así mesmo, se se resolve que unha peza premiada no concurso CinEOI 2019 é un plaxio, a organización retirará o premio.

Non se admitirán obras que inciten ao racismo, á xenofobia, á violencia de xénero, á homofobia ou que atenten contra a dignidade da persoa. A comisión de selección decidirá que traballos son admitidos. Así mesmo, poderán non ser admitidas a concurso as curtas que non presenten un emprego axeitado de lingua galega, a xuízo do xurado especialista en lingua galega.

Os autores e autoras das curtametraxes ceden gratuitamente os dereitos das súas obras para facer uso delas para exhibilas e duplicalas sen fins comerciais ata finais deste ano co fin da promoción do concurso. Calquera apropiación indebida de dereitos de autor ou autoría na curtametraxe é responsabilidade da persoa que a inscribiu

Os autores e autoras aceptan que os seu nomes se poderán facer públicos nos perfís sociais, páxina web e demais eventos de promoción do concurso.

Na **categoría xeral** o xurado estará composto por recoñecidos membros do sector audiovisual e cinematográfico galego. Decidirán todos os premios da categoría xeral e xuvenil agás os premios “Ben Falado”, que os fallará un xurado especialista en lingua galega.

Os **premios Ben Falado** das tres categorías outorgarase á curta que presenta o mellor nivel de lingua galega e que representa un bo exemplo de uso da nosa lingua.

Na **categoría CinEOI Inspiración** o xurado estará composto por membros da comunidade educativa da EOI da Coruña. O premio “mellor curta de aula” se outorgará á mellor curta amateur realizada no contexto dun traballo de aula ou realizada por un grupo de aula de EOI. Deberá constar o nome de todas as persoas participantes, curso, grupo e nome da/do profesor/a. Neste premio valorarase a participación e a proposta. O premio á mellor vídeo-mensaxe en galego se outorgará á peza audiovisual (texto, canción, poema, etc) que teña un contido máis inspirador ou impactante (concienciación social, solidariedade, altruísmo, etc.). A súa duración non superará os 2 minutos. As pezas desta categoría optan tamén ao premio Ben Falado da categoría xeral.

Outorgaranse un **premio do público** á peza que acade máis votos entre os asistentes á proxección das curtas que se celebrará o día anterior á gala.

O concurso inclúe a celebración previa dun “OBRADOIRO ACHEGAMENTO PRÁCTICO AO PROCESO DE REALIZACIÓN DUNHA CURTAMETRAXE” como promoción do certame, de 30 horas de duración, que se realizará entre febreiro e abril de 2019 na EOI da Coruña e na sala de informática do Ágora. Este curso será financiado polo Concello da Coruña. O obradoiro é voluntario e de balde, e poderá inscribirse nel o alumnado dos centros educativos que participen nas categorías xeral e xuvenil, a través da web educativa www.edu.coruna.es

O Festival de curtas CinEOI celebrarase os días **8 e 9 de maio de 2019**. A proxección das curtas presentadas terá lugar o 8 de maio e a gala de entrega de premios será o 9 de maio na EOI da Coruña.

A participación neste concurso implica a aceptación destas bases.

O Servizo Municipal de Educación do Concello da Coruña participa na organización deste concurso.

